

## 19 de Martzu, Festa de su Babbu

Su 19 de Martzu de dónnia annu in Sardigna, in Itàlia e in àterus istadus, est sa Festa de su Babbu.

Pruscatotu in is istadus católicus, est de su Mesu Evu chi s'afestat custa dí, ca est sa matessi dí chi afestaus fintzas a Santu Giusepi, su babbu putativu de Cristu Gesus. Is primmus a ddu afestai funt istétius is Mónacus Benedetinus, in is primmus annus de su Milli, e a pustis is Francescanus.

Est in sa segundu metadi de su 1800 chi sa Crésia iat proclamau a Santu Giusepi s'amparadori de totu is babbus de famíllia e patronu de sa Crésia Universali. Papa Leoni XIII iat narau ca Santu Giusepi fiat su mellus modellu po totu is babbus e un'esempru de amori e de cuncórdia po is isposus, e fintzas ca is nóbbilis depiant imparai de issu ita fiat sa dignidadi, e is arricus cali depiant èssiri is cosas diaderus de importu de disigiai.

Finas a candu no est essia sa Lei n. 54 de su 5 de Martzu 1977, in Itàlia sa dí chi s'afestat a Santu Giusepi, e duncas sa Dí de su Babbu, fiat una dí festiva. In àterus istadus, in Isvítzera o in Ispagna, po narri, est ancora aici. In su 2008 unus cantu políticus ant iscritu una pariga de disínnius de lei po torrai a ponni custa data cument'e dí festiva.

Santu Giusepi, sendi chi est sa cona de sa mellus bisura de unu babbu, in sa traditzioni amparat fintzas is órfunus, is giòvunas bagadias e is prus malassortaus. Est po custu chi a logus, in Sitzília po narri, costumant a cumbidai a prandi is prus póburus. In àterus logus, sa Dí de su Babbu est sa matessi dí de sa festa de s'acabbu de s'ierru: duncas, cument'e ritus po otenni bona sorti, abbruxant su chi no ant arregortu de su sartu e, in is pratzas, faint fogaronis chi tocant a ddus sartai a brínchidus.

Nosu de s'Uffitziu de Língua Sarda de su Progetu "Sa Marmidda chistionat in Sardu", cun su Comunu de Tuirì impari a is Comunas de Barúmini, Gésturi, Is Pratzas, Setzu e Biddanoa Franca, po fai is norabbonas a totu is Babbus de Sardigna, eus pentzau chi sa cosa mellus siat de ddu fai cun una poesia in Língua Sarda. E chini mellus de Antiocu "Montanaru" Casula, unu de is prus poetas mannus e famaus de Sardigna, at cantau is Babbus? In s'imàgini acapiada "A babbu meu".

**SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.**

# A babbu meu

*Su continu pensare, su soffrire,  
No han bintu sa tua volontade,  
A sas tempestas d'ogni calidade  
Has ischidu che rocca resistire.*

*Cun sos fizos pienu de buntade  
Cun mamma sempre pruntu all'obbidire,  
Ogni vizio has pòttidu fuire,  
Onestu sempre e senza vanidade.*

*Como subra sa forte conca tua,  
Chi dolorosas penas han frittidu,  
De s'edade cumparit cuddu nie.*

*E passen sos annos, passen sempre a fua,  
Ma a mie restat s'esempiu candidu  
D'unu nobile babbu che a tie.*

**(A. Casula "Montanaru")**

# 19

# Martzzu

Festa de su Babbu



REGIONE AUTÒNOMA DE SARDIGNA  
REGIONE AUTONOMA DELLA SARDEGNA



## SA MARMIDDA CHISTIONAT IN SARDU

Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018



COMUNU DE TUIRI  
COMUNE DI TUILI



COMUNU DE BARÙMINI  
COMUNE DI BARUMINI



COMUNU DE BIDDANOA FRANCA  
COMUNE DI VILLANOVAFRANCA



COMUNU DE GÈSTURI  
COMUNE DI GESTURI



COMUNU DE IS PRATZAS  
COMUNE DI LAS PLASSAS



COMUNU DE SETZU  
COMUNE DI SETZU